

Na nivou ovog tužilaštva u radu su istražni predmeti manje složenosti, od kojih se prioritarno rješavaju istrage po poznatom osumnjičenom, dok se pored zastupanja ranije podignutih optužnica, intenzivno radi i na rješavanju slučajeva po nepoznatom počiniocu.

U periodu najintenzivnijeg rada na predmetima ratnih zločina, od 2004.g. do 2014. g, Tužilaštvo Distrikta procesuiralo je svih četrnaest osoba iz predmeta kojima je Međunarodni krivični tribunal za bivšu Jugoslaviju u Hagu dodijelio A oznaku složenosti. Šestoro njih je u Brčkom pravosnažno osuđeno na ukupno trideset i jednu godinu zatvora, i to: Kosta Kostić (15 godina), Konstantin Simonović (6 godina), Pero Rikanović (5 godina i 6 mjeseci), Monika Karan Ilić (2 godine i 6 mjeseci), Alekandar Ostojić (1 godina) i Dragan Živković (1 godina). Procesuiranje četiri osobe ustupljeno je drugim nadležnim organima, dok su istrage protiv isto toliko osumnjičenih obustavljene. U skladu s tada važećom državnom strategijom, procesuiranje tri osobe ustupljeno je Tužilaštvu Bosne i Hercegovine, a za jednu od njih krivično gonjenje s ove instance ustupljeno je Tužilaštvu za ratne zločine Republike Srbije. Pravosuđu te zemlje, Tužilaštvo Distrikta ustupilo je procesuiranje jedne osobe.

Revidirana državna strategija za rad na predmetima ratnih zločina usvojena je 2020. g. s ciljem da unaprijedi procesuiranje predmeta ratnih zločina pred domaćim sudovima i tužilaštvima, posebno kroz odgovarajuću raspodjelu predmeta između pravosuđa na nivou BiH, entiteta i distrikta Brčko. Aneksom B Strategije predviđeno je efikasnije procesuiranje najsloženijih predmeta, među kojima su prije svih predmeti protiv lica s A-liste Pravila puta, odnosno predmeti s ranijom standardnom oznakom A.